



Uhapšeno šest kradljivaca vozila

U akciji Volan do sada je uhapšeno ukupno 19 osoba • Osumnjičeni su od 2010. do danas u BiH kralji vozila uz pomoć sofisticiranog alata

Šest osoba sa Sokoca i Pala uhapsili su pripadnici **SIPA** u nastavku operativne akcije kodnog imena Volan, zbog organizovanog kriminala, krijumčarenja vozila, teških krađa i iznuda. Akcija protiv struktura automafije izvedena je 13. jula navečer na području Sarajeva, Istočnog Sarajeva, zapadne Hercegovine i BiH.

Upozorenje automafiji

Među uhapšenim se navodno nalaze izvjesni Puki sa Pala, Kršo sa Sokoca, S. T., dok **SIPA** traga za izvjesnim Mančom i D. C. iz Istočnog Sarajeva. Akcija **SIPA** navodno je

izvedena i prije nego što je planirano jer su novinskim napisima koji su medijima plasirani iz pojedinih policijskih agencija - da policija sprema kontraudar automafiji, osumnjičeni bili upozoreni na predstojeću akciju...

Do sada je ova akcija obuhvatila ukupno 19 osoba, od kojih se 9 od ranije nalazi u pritvoru, a aktivnosti su usmjerene na identifikovanje, otkrivanje i procesuiranje nositelja najozbiljnijih oblika autokriminala na području BiH.

Akcija Volan do sada je najopsežnija akcija u borbi protiv automafije u BiH, u kojoj je učestvovalo više desetina policijskih operativaca **SIPA**, tim Centralnog istražnog ureda Granične policije BiH, te tim službenika MUP-a Kantona Sarajevo.

Iz Tužilaštva BiH tvrde da su prikupljeni dokazi da su osumnjičeni, članovi organizovane kriminalne grupe, koja je djelovala u oba bh. entiteta, nakon krađe vozila, za njih tražili otkup, te ukoliko otkup ne bi bio realizovan, vozila su krijumčarili u susjedne zemlje i prodavali sa krivotvorenom dokumentacijom, ili vozila sjekli i prodavali u dijelovima diljem BiH.

Osnovano se sumnja da su pripadnici organizovanih kriminalnih grupa, koje su djelovale na području Sarajeva, Istočnog Sarajeva,

Akcija je izvedena 13. jula

Hercegovine, Mostara, Tuzle i drugih mjesta, odgovorni za veliki broj krađa skupocjenih motornih vozila koje su se desile od 2011. do 2017.

"Za uhapšene osobe postoje osnovni sumnje da su od 2010. godine do danas, na području BiH, kao pripadnici grupe za organizovani kriminal kralji vozila uz pomoć sofisticiranog alata i opreme. Istragom je utvrđeno da su ukradena vozila odvozili i sakrivali na različite lokacije. Zatim

su organizovali njihovo prebacivanje preko granice BiH, izbjegavajući carinsku i graničnu kontrolu, nakon čega su vozila ili dijelove vozila prodavali na području Srbije, Hrvatske, Crne Gore i šire ili na području BiH u rastavljenim dijelovima. Svaki od pripadnika ove kriminalne grupe imao je određenu ulogu i zadatke, za šta je dobijao određeni procent novca od konačne dobiti. Na osnovu preduzetih operativnih i istražnih radnji,

prikupljeni su dokazi koji ukazuju na to da su pomenute osobe na ovaj način povezane sa krađom više od 100 različitih vozila", saopštili su iz **SIPA**.

Akcija X

Podsjetimo, sličnu akciju, samo pod nazivom X, **SIPA** je izvela u februaru, kada su uhapšeni Goran i Marko Nižić, Jozo Markić, Ferdo Vukoja, Mihael Menal i Željko Brkić.

DRAGAN PAVLOVIĆ

Na osnovu preduzetih operativnih i istražnih radnji, prikupljeni su dokazi da su pomenute osobe na ovaj način povezane sa krađom više od 100 različitih motornih vozila